

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

12

T 3237/4632.83

梧州府志卷之十九

人物志

隱逸

漢

牟子者蒼梧人名字無可考當東漢末年天下擾亂牟子將母避世交趾時中原士人咸來茲土多為神仙辟穀之術而牟子獨以經學鳴蒼梧太守聞其賢檄署吏不就州牧辟之復稱疾不起嘗曰老子絕聖棄智修身保真萬物不干其志天下不易其樂故可貴也於是銳志樂道研老子五千言

哈佛大學漢和
圖書館珍藏印

後竟不知所終

明

黎廣德蒼梧人有隱德以孝友聞壽百有三歲有司歲時存問天順間寇陷城廣德衣紅褐坐廳中寇不忍害乃撫其背曰翁何壽若此願得翁紅褐壽我廣德解與之寇皆羅拜且遺之米與牛肩而去後築梧城太守袁衷親禮迎之廣德歌落成詩環聽者莫不稱嘆郡人俱呼之爲百歲翁

謝仲仁容縣人博習詩書不事功名惟玩遊山水以適志有四子咸教以善鄉人有忤已者則和顏

解之如大不得已則杜門避去橫逆亦無所受縣令張學顏傳大聘咸嘉獎之

黎鯨藤縣人少補學宮弟子不屑與世競名隱於醫狀若不勝衣至切脈五臟癥結無不洞見時有副使召視疾見鯨狀少之鯨乍按卽得實乃驚起謝不再劑而疾愈他皆類此年踰六十始得子八十後步履不減少時是深得內養之術者

封鏗容縣人初攻舉業當明季兵燹後家無藏書聞邑侯李公瑞徵攜有理學宗傳請借抄錄遂棄諸生築室於一里之坡際究心伊洛淵源杜門四

十餘年足不八城市時或引醇醪數盞負杖林薄
間歌咏以見志人皆稱曰坡際公壽七十餘無疾
而終

人物

僊釋

附方技

何侯者相傳堯時人隱蒼梧山至夏時已二百餘
歲上帝賜藥一器家人三百餘口拔宅上昇相傳
為太極真人

漚媪容縣人漢時煉服於都嶠山每日於山脚采
蕨克餓久之坐化於巖中因曰娑漚巖

按通志載漚媪漢時人少寡煉丹都嶠山採薇
以克食日久坐化於巖因名漚巖陀媪同時人
好施齋亦坐化於巖二巖因而得名所謂漚陀

巖者卽中宮巖耳李永茂易名漣漣巖非有兩巖也又晉康志載溫氏媪者端溪人於水澗得一卵大如斗歸置器中有物如守宮出於卵媪放之成龍卽龍母也一說龍母本姓蒲素始皇時人後誤爲溫者見孝通廟注與婆媪事適足相疑然不可考矣

葛洪字稚川句容縣人家貧好學伐薪買紙筆且抄且讀以儒學知性寡欲無所愛玩不知碁局幾道或尋舊書問義不遠數千里好學神仙導養之法從祖元吳時學道得仙號葛仙翁以其煉術授

弟子鄭隱洪就隱學悉其法後師事南海太守上黨鮑元妻以女授洪內養之術太安中石冰作亂吳興太守顧秘檄洪爲都尉討破之遷伏波將軍洪見天下已亂乃叅廣州刺史稽含軍事含遇害停南土數年始還鄉里元帝爲丞相辟爲掾以平賊功賜爵關內侯不拜咸和初司徒王導召補州主簿選爲散騎常侍領國史洪以年老固辭不就聞交趾出丹砂求爲勾漏令帝以洪資高不許洪曰非欲爲榮以有丹砂耳帝從之

按一統志云洪爲勾漏令嘗於寶圭洞修鍊成

仙容縣志載巾子山麓有瀑布如練冬夏不涸
葛仙居之懷集志載洪遊名山過泮水縣覽花
石洞遂居道士巖覓丹砂採金鵝蓋今丹竈中
有抱朴二字隱隱尚存及考廣州志顯宗咸和
間洪爲散騎常侍聞交趾有丹砂求爲勾漏令
帝從之洪以子姪俱行至廣州州刺史鄧嶽留
之不聽去止於羅浮山煉丹自號抱朴子後忽
與嶽疏云當遠行尋師尅期便發嶽得疏急往
與之別洪已兀然而逝視其貌若生昇屍入棺
若舉空衣然世以爲尸解觀此則洪成仙於羅

浮矣而乃謂修煉於寶圭及居中子山花石洞
者徒傳聞耳蘇子瞻與王安國書云葛稚川求
爲勾漏令而竟化於廉州其說又異蓋葛洪仙
蹟所在多有大抵多屬傳會無庸深辨勾漏本
屬容而各志又載其蹟正未可議刪耳

唐惠能禪師謁黃梅五祖五祖傳衣鉢與能密囑
能速去恐人害之能曰向甚處去祖曰逢懷則止
遇曹則藏唐武后時說法於永寧州雙瑞巖後往
曹溪成道世稱六祖又嘗潛至懷集上愛嶺最高
峯頂石室栖遲至今猶名六祖巖云

何尊師不知何許人唐龍朔中嘗往來蒼梧間來無所慕去無所數至百餘歲人嘗見之狀貌不改如四十者行步如風人問氏族但云何何詰其鄉里亦云何何人因號何爲尊師

洪禪師宋時人少持齋好釋家言寓藤州崇善寺中危坐常如泥塑竟日不飲食壽九十餘屍解而去契嵩字仲靈藤州寧風鄉人也七歲出家寓縣東廣法寺年十九通經史飛錫湘山遍遊天下名勝慶曆初到汴京上萬言書文彩傾動一時嘗以所作呈歐陽文忠公甚推重之東入吳越住錢塘

靈隱寺後歸圓寂東山賜號明教大師有鐔津集行世

馬知章藤州鐔津人也爲道士獨持道德南華兩經曰真宗在是矣同邑契嵩重之目爲道交

呂仙純陽嘗憇梧之阜民岡郡人因構呂仙亭元天歷間疫大作有張彥才者夢一道士入其家求庭前樟樹爲呂仙像彥才許之明旦風拔樹置亭下疫遂息元末像左指間生靈芝一本狀如蓮花馨香襲人明嘉靖間芝又生於亭磚

潘益宋皇祐時蒼梧人有異術嘗儒衣大翼能豫

言人禍福知自盡時廣源蠻儂智高至梧聞其異
挾問之曰吾何如盎曰一賊耳又曰梧城幾日可
陷盎曰百年不陷又曰吾生欲王粵何如盎曰行
將斬首豈能王哉遂遇害

邵道士字彥甫容縣人住都嶠山善鼓琴蘇軾歸
自雷州過容縣贈以句云身如芭蕉心如蓮花百
節踈通萬竅玲瓏來時一去時八萬四千此義出
楞嚴世未有知之者也元符三年九月二十日書
贈都嶠邵道士相送之藤又有藤州江上夜起對
月贈邵道士及送邵道士還山詩

盧某失其名宋時人一日往崎嶇採樵遇仙盤桓
片時出山已三歲矣後長遊都嶠不還時有見之
者童顏如昨邑人爲之立望仙坊

李上座蒼梧人得受異術修煉成道能興雲致雨
降魔伏虎於城東三里舜廟之後制伏猛虎於巖
中如馴養者不傷人物名爲伏虎巖云

莫道人者容州人居石峒八山不知年問之亦自
不言歲數山下父老有八九十歲者言自少時已
見之矣容貌鬚鬢不異於昔登山如飛不避寒暑
蕭然一菴傍無侍者嘗夜坐於飛雲頂石巖間有

虎侍旁達旦乃去貴宦遊山求見之多不遇遺之詩者不一宋理宗末年猶在

楊岐乘廣者容州人張氏子七歲學書十三慕道至衡陽依天柱入洛謁荷澤會契真乘由是南反中經楊岐一見峯巒賞其奇秀謂可開築遂成道場踰嶺以北涉湘而南法侶望山如趨鷲嶺

鄧清字子真正統間羽士世居岑溪習瑜珈教得異人之傳有道術符咒靈驗一日雷神擊物遇穢墮地清爲咒水洒淨雷神飛昇自是道術益進善村山巖多勝清遷居其下嘗聚山峯頂羽化之日

棺爲風雨挈去置石中鄉人見其神異立祠祀之凡遇水旱疾疫祈禱輒應

烏焚僧正統間住衡山鴈峯寺過全州謁無量禪師州大夫禁逐遊僧遂至懷集寓蓮花巖內年九十餘洞民日施蔬食天順改元冬天火降洞僧移蒲團巖外坐化未幾飛鳥萬計各擇羽覆之一日如墓二日如廩三日如邱陵有一鳥大如鸛羽毛俱盡啼於巖壁旣旬日枯茅叢中火起燃及毛堆此鳥墜火與僧同焚後有人見一小兒騎一長尾鳥飛向讜山絕頂而沒

梁賢植梁之德容州西南峒望山方人賢植年二十三歲之德長一歲隆慶甲申四月同遊都嶠山攀蘿而上抵山巔梵宇三楹閒無僧道惟神像鐘魚而已山泉清冽樹有一桃如人食其半者取而分陷之味殊甚一時神氣頓豁比歸不復粒食容色紅潤異常惟背微偃僂鎮帥程召至空室扁其戶數日如故始信而禮之辭家遊蜀莫知所終余道人不詳名氏家懷集劍峯石下自幼入道士巖誦黃老經精巫術嘗用口咒桃符治病立愈禱雨逐疫咸應年九十餘一日午眠無病而逝洞南

有梁姓者同日暴病亦死二日復生家人驚詰其故曰昨遇紅衣二人縛至壇林社公社母罵日向日戊祭未陳設先盜肉食擬杖一百解酆都值一官乘白馬來金冠繡袍鼓吹仗蹕甚肅及近識是余道人余問社公所執何爲社公告以故余曰愚民犯輕因得釋回事在嘉靖間

李孔修字子長懷集人遨遊蒼郡羊城間放浪不羈師新會陳白沙及歸白沙送以詩云春權去江門沂流焉汲汲點筆烟外山歸來看懷集又勸其謁張太守詩云不聞端別駕敬士如子長問道蒼

梧下登歌刺史堂其後或往或來踪跡奇幻相傳以爲仙去

藤縣程二者谷山土著得異術坐一鳧以渡鬱水遇孕婦其術不神遂溺其尸逆流附岸坊人立祠祀之

正妙想蒼梧女道士也辟穀服氣住黃庭觀邊水旁朝謁精誠想念丹府由是感通至朔旦有雲氣蒸罩歲餘若有音樂下降又歲餘若干乘萬騎擁一人羽衣寶冠升殿而坐妙想謁見命侍臣以道德經及景靈丸授之十年後妙想白日昇天

方技

董奉字君異侯官人居廬山得仙術蒼梧士燬病死已三日奉以藥一丸用水調灌之并搖其首少頃目卽開手足漸能動半日起坐四日遂言語如常

賓公逸其名宋時人嘗遇異人授白鶴青鳥之術尋龍穴沙水若犀照留記示後往往奇中雖載籍失考而各處記地皆賓公所遺楊松筠過昭州見賓公曰粵有人矣遂去是地術中之有道眼者梁大用宋時蒼梧人世奉洞賓一日遇異人授以

白石一塊剖之得三鉄針并針灸書人有病患針之無不愈者民賴壽考明永樂中郡守羅觀訪其家猶得一針進於朝

陳楠字木號翠虛惠州博羅人以盤櫛籬桶爲生浮沉世俗莫有知者後得異術嘗之蒼梧適遇郡禱旱人憂暵死翠虛乃持鐵鞭下淵潭驅龍須臾陰雲四合雷雨大作境內霑足遂爲豐年

通志

人物志

列女

公父文伯之母曰夫民勞則思思則善心生逸則淫淫則忘善忘善則惡心生旨哉言乎梧俗樸而儉家無紈袴室無綺羅故往往閨秀賢媛能嚼然自矢冰蘖而不移卽草野簪著之女井里汲甕之婦亦多清操勁節爲閭閻光所以維風而礪俗者又豈少也哉雖然僻爾窮簷豈能盡邀旌典獨沉隱於載筆者之手爲可悲耳岡或遺焉岡或借焉則恃乎司採訪者

明

梁氏蒼梧舉人李實妻實死梁年十九歲遺腹一子辛勤撫育事姑甚孝姑死或諷其再醮輒以義斥之貧甚而節益謹子娶婦舉一孫而子復夭婦他適梁撫孤孫備極艱苦督學周孟中聞而旌之宏治間太守張吉給以粟帛

駱氏尙書吳廷舉之母處士英之妻英早世哭幾絕闔屏屏處廷舉遭暴疾羣叔意其必死欲具檮禁母爲禱藥氏勿聽晝夜不少瞬諸姬番休更視疾竟瘳少長督之學曰若不逐晷自策勵日與鄉

人俱母將何歸耶時家索莫甚歲連禳而師賓問遺率如常已則澣滌紉綴性不喜紛華嫁時衣三十年尙澹如也花晨燈夕蒼梧以遊觀爲俗酷惡之俗有化之者年五十而卒

舊志失載今據通志縣志補人

按尙書有弟廷弼舉人以友義著聞今考母傳止載尙書一人弼豈其從弟耶

張氏梧州守元春女也歸方指揮使能順事舅姑指揮與姚源盜戰死氏年二十二有娠卽默禱曰男也吾與俱生女則俱殉矣踰月而舉子恩指揮家故涼茹荼履棘朝夕不保奉其姑戴與恩相依

爲命者四十年恩就外傳氏督之甚劬時時語以
父死國事勗其勵志成立嘉靖初卹死事授恩都
指揮僉事旣以氏貞節聞復詔旌閭而恩得僉書
江西都司氏曰兒一旦蒙國恩名位抗藩臬諸拜
跪受事者固乃父輩儕人也少有瑕指摘者競起
敗矣須勉爲之已而恩擢漕運叅將氏身留養姑
姑歿以毀瘁卒

石氏蒼梧生員李汝器妻會府委器賈詔陸川被
寇傷卒石年二十二訃至欲以死從親隣勸阻不
得死遺腹三月舉一子家貧無翁姑有祖姑年七

十餘孝養無懈祖姑卒依孀母紡績自給伶仃淒
苦聞者墮淚及子長有室猶時義烈自奮曰夫死
王事余胡不死苦節五十餘年八十五乃卒

張氏梧州千戶王大坤妻年二十五夫死無子同
官知其賢欲聘之氏矢志不從寡居四十八年始
終如一壽七十三而卒

譚氏名趙相蒼梧舉人歐良妻良死年二十二無
子以死自誓孀居四十餘年清節無玷

石氏蒼梧人尹世雍妻知縣石璫女歸雍九載雍
歿無子家貧甚或勸石改節毋自苦石叱之姑亦

早孀性嚴厲日紡績奉甘旨時人稱爲雙節婦姑相依始終無間焉

麥氏蒼梧人劉濟邦妻劉病篤麥知其不起預爲二棺劉死麥卽自縊

鍾氏蒼梧人阮應福妻年二十喪夫家貧甚力撫遺孤守節不二

莫氏蒼梧舉人劉思聰妻初聰授程鄉縣教諭赴府爲賊所執莫聞撫膺嘔血死邑士人憐之爲立貞烈坊於程鄉學前

阮氏蒼梧人廖紹祿妻年二十三而寡子在襁褓

誓不二志家貧勤績以撫諸孤隣舍火起延燒其居時夫柩在殯氏募人遷徙至中門棺紼忽斷煙燄蔽門幾及於柩氏膺柩慟哭願與俱焚頃忽返風火及中門而滅

龍氏藤縣人夫王克讓早卒孝養舅姑執爨之暇卽理紡績舅歿旣葬姑憐其少諷令他適龍曰此身旣爲王氏婦矣敢有他志永樂間有司以事聞旌之

張氏藤縣人李可信妻信歿張守節六旬如一日宏治間督學姚鎮旌之

李氏藤縣人適胡瑛早亡無嗣事姑孝謹姑亡營
葬如禮嘉靖間知縣林茂桂白其事於督學旌其
門曰貞德又曰貞節之門

萬氏藤縣人諸生林俊妻俊亡萬年二十有六撫
孤子孝養舅姑不怠有議贅者萬覺闔戶求自盡
姑因爲備得不死議亦寢而勵志愈堅嘉靖己亥
有司以其事聞旌表其門

李氏藤縣人胡英妻英死李年二十五無子誓不
再適事姑以孝稱姑歿葬以禮嘉靖間督學黃佐
旌其門

李氏藤縣人庠生霍文諫妻諫卒李年二十有四
誓不再適事瞽姑艱苦不渝姑目復明人稱孝感
子有菁庠生有葦歲薦壽七十八終嘉靖間知縣
林傑旌其門

林氏容縣人覃泰妻年十八歸泰泰卒林不再偶
家甚貧紡績自給前後直指使者四旌其門

扈女者容縣人扈塗女也年十六受同里民甘禮
聘未字禮夭父母亦相繼亡內外無依扈守貞自
矢家貧紡績以給衣食寢處惟一室親疎罕見其
面邑人士咸稱舉之萬歷十五年奉詔旌其門

潘氏容縣人潘泓女封仁廉妻二十五守節萬歷三十年遇例勘舉三院交揚登節婦錄

潘氏容縣人潘龍駿女生員楊允齊妻年十六適楊甫七日而齊死潘矢志孀守栢節水操久而彌肅萬歷四十五年三院旌之

李氏名妙容岑溪縣人年二十適舉人羅章章赴南宮卒於途李哀慟垂絕姑耄事之曲謹里人嚴定求伉儷李忿志服毒藥幾死力救免知縣陳琦聞而賢之賑以粟帛

嚴氏岑溪人廩生梁觀政妻年二十八夫卒號慟

殞絕救之得甦復引繩自縊姑憫止之家甚貧窶日親井臼夜勤紡績教二子讀書有成以苦節終其身鄧氏節婦嚴氏仲子梁蔡之妻也年二十四夫卒誓不再醮依於孀姑自甘苦節年踰六十有司具狀并嚴氏聞於巡按涂宗濬特旌之賚以米布匾其門曰雙節門

傅氏懷集人潘聰妻聰客死同客者以其骸歸傅氏抱之號哀幾絕及葬傅誓曰吾必相從於地下縊於後圃隣婦力護之不得死已乃潛縊於寢室親屬買棺殮之與夫骸合葬有祠在墓所

李氏懷集人坊郭里民莫瓊妻年二十四瓊卒生子源貧甚李守節養源源婚又卒鞠幼孫更相爲命始終無間

蔣氏懷集人靖州知州蘇恣妻明宣德間恣守城捍禦死於寇無子蔣年二十六矢志終身夫忠婦節世稱雙美有司咸式其閭

陳氏懷集人梁可珍妻年二十三夫卒守節始終不渝雖豪強脅之以勢不能動也

李氏懷集人袁暉妻年十八而暉故家貧一子甫週歲親隣慮之李曰命也更復何適孀守六十餘

年壽八十六卒

鄧氏懷集人徐葵妻葵死誓志守節年二十有四撫訓二子長應坤以選貢判嘉定州次應兆庠生壽九十餘知縣謝君惠旌其門曰貞慈裕後

林氏懷集人梁起潛妻潛故氏年二十四撫孤力紡績父母以家窶年少勸其再醮氏誓死不從教次子儲英有聲黌序諸孫蔚起人羨爲苦節之報年八十七卒

李氏懷集人梁允珩妻珩卒年二十七苦節訓子性嚴肅以勤儉教諸媳年九十七一日呼子孫齊

集曰我守節七十年始終如一日今厭世矣沐浴
端坐瞑目而逝其子果司訓寧化文行優裕爲閩
所重蓋由李氏義方之教云

鄭氏懷集人陸滿妻年二十四滿卒堅志茹苦以
終其身

于氏懷集人張雲祥妻萬歷初尙穉嚴秀珠及雲
祥從堂兄百戶張大經進勦陣亡于年二十二舅
姑垂老子中美僅三齡日紡績以備甘旨夜燃薪
以課誦讀而舅姑連喪悲苦彌深貞操日勵中美
著聲鬢序孫應璧登崇禎己卯賢書于猶及見卒

年八十知縣李盤旌其門曰貞操餘慶

何氏懷集人莫停宗妻年十七適宗甫一載而宗
歿遺腹生子炫霍何上奉孀姑下撫弱子種芋營
膳備嘗諸苦迨子炫霍學成游泮年七十有四卒
知縣李盤旌其門曰節炳懷陽

國朝

黎氏蒼梧人廩生李良幹妻幹病無藥黎割股食
之而愈後數年幹死黎年二十有七栢舟自矢撫
子成立至八十七歲始歿按君田昇龍表額曰婦
道千城總制于時耀表額曰節義維風

李氏蒼梧人張經綸妻年二十經綸死遺子始遇
李守節不渝紡績自給教子成人七十七歲而終
謝君惠曰袁石公咏節詩裏淚看零丁忍作山
頭石夫化石化於情耳世亦有死情不死節者
又曰立孤丈夫難矧爲女也特蓋死易而立孤
難立孤而生猶賢其死孤立而死猶賢其生也
梧郡諸節烈冰心不涅俠骨猶香皆有之死靡
慝之風焉可以媿天下之鬚眉而易塞者
陳天植曰女之事夫猶臣之事君也事君者居
恒好慷慨談節義萬一身遭變故鮮弗喪其所

守况女子乎夫女子性柔懦又闇於大義苟能
守從一之志以終其身比之從容就義抑又難
矣及夫節烈捐軀視死如歸雖與日月爭光復
何忝焉自兵寇交訌以來梧陽貞女淑媛罹難
而守正不屈以殞其身者當亦不乏乃徵書旁
求十邑之中竟無一二採訪以應嗟乎文獻不
足表章無聞司風化而令珠沉璧隱與草木同
腐豈不惜哉

關氏蒼梧人何子瀚妻年二十六夫喪無子一幼
女立誓守貞紡績奉姑不少懈年六十而歿有遺

本州府志 卷之十九
產十餘畝捨入河口市太平廟鄉人哀之置主於東廓祀之名其產爲節婦田葬城東鳳凰山駱節婦墓右

甘氏蒼梧庠生蘇祚灝妻年二十五喪夫栢舟自矢孝事舅姑撫教二孤備歷艱難三十九載康熙六十一年具題建坊八十而終

吳氏蒼梧舉人王地焜妻年二十二夫亡家貧事姑孝撫二藐孤曰瀚曰滄一寓慈於嚴無少姑息及就傅尤嚴督課常教以刻苦讀父書毋墜家聲俾乃父不暝於地下淚涔涔相誠也雍正己酉瀚

滄同登鄉榜九年舉報節孝題旌建坊越二年癸丑瀚滄又同舉進士遠近傳爲盛事咸謂天之所以報苦節者爲益現其奇也

易氏蒼梧梁巨祚妻年二十五喪夫孝事孀姑維持夫嗣以義方訓誨生平好施捨亦愛讀書於列女傳及古文之類嘗反復焉子士倓爲諸生乾隆十一年請旌建坊

覃氏蒼梧生員蘇汝榭妻年二十五夫亡無子事姑孝擇立承祧以承夫祀艱難三十餘載撫嗣子海列成均乾隆十四年請旌建坊

黎氏蒼梧黃贊妻也年二十三而寡孝事二姑義方教子苦節三十餘載其子如瑒如琰俱列膠庠乾隆十九年請旌

黃氏蒼梧潯陽鄉莫踰綸妻歸莫甫一載夫亡氏痛哭幾死者再感黨勸以守待遺腹幸生男卽夫有後矣及夫喪越月果生男彌月抱子哭奠於夫之靈以守節自誓孝養祖舅姑拮据喪葬皆成禮教子成立守節三十九年而卒

文氏蒼梧曾傑源之妻年十七歸曾門以孝稱二十六歲夫故遺二子氏勵志堅貞以女紅奉養衰

姑備物致敬教子刻苦力學歲歉氏日不再粥冬不重衣二子欲束書謀生計氏不許曰余艱苦十餘年於此惟冀汝兄弟讀書立名以繼乃父志余卽凍餓死無所憾况未必死乎子乃益奮長熹登庚午賢書次照亦爲名諸生清節四十六年郡人謂苦節昌後信不虛云

馮秀瓊蒼梧戎墟人孝廉儒經孫女也幼聰慧喜讀書儒經授以列女傳及諸經史輒能悟大義年十七受聘於同邑羅文燦燦病危瓊欲往視父光墀不許未幾燦死瓊易服求奔喪又不許瓊退泣

語婢曰我志已決湘君招我矣婢聞之而不察也
是夕出門投大江死鄉里驚悼數十里求其屍竟
不可得

霍氏蒼梧人年二十歸生員梁廷燕時繼姑染患
風痺氏侍床褥者三年如一日姑亡哀毀夫廷燕
尋以病瘵卒氏時年二十三無子慟仆幾死者再
翁老疾賴氏調養終其天年家素貧拮据治三喪
待嗣十年乃立繼子城撫養教誨補邑庠弟子員
得承夫祀苦節三十二年

梁氏蒼梧小南門外監生曾子發妻于歸後生一

子夫故時年二十四氏以冢媳孝養克聞翁姑有
譽能代子職諸叔姒咸欽敬之教養孤子修成立
貢成均守節三十五年

霍氏長洲人監生嚴德醇妻年二十于歸生一女
二十四歲喪夫事姑盡孝養爲夫立後三十八年
苦節族黨咸欽敬之

陳氏蒼梧伍重文妻年十六適伍生二子二十五
歲夫亡時姑老子幼旣無叔伯終鮮兄弟零丁孤
苦窮操紡績以資養育姑死盡變衣珥以爲殯葬
泣血送祭婦而兼子職次子道憲成立克家家稍

給氏又好行善事修路施棺卹親隣之貧乏者現年九十歲

蘇氏蒼梧余文秀妻年十八適余姑已早喪越三載翁故氏夫哀毀成疾未逾年亦卒氏時二十一歲有遺腹踰六月而生一子氏撫孤悲痛教以成立隣里無不哀而敬之現年七十計苦節五十一

年
易氏蒼梧人李作樾妻年二十夫亡無子痛不欲生作樾本孤子其祖之珙任宜君令居官廉潔又以虧帑蕩產及歸無以爲生衰髦沉疴賴氏以多

方爲調養得終天年又爲夫立嗣以繼三世之祀苦節三十九年

陳氏蒼梧李芝秀妻十八歸於李越四載而寡遺一子翁姑并染沉疴氏侍湯藥晝夜不離歲饑掘蕨根剝茹皮以食苦節三十年

呂氏蒼梧蘇諒妻諒方應童試苦讀致疾病卒氏年二十二歲產一女無子氏痛哭昏絕願以身殉如娣時防護之旣除服父母勸其改適氏矢靡他三立幼嗣而皆不育氏泣曰吾命也夫三十年隻影淒清操行無玷

余氏蒼梧貢生鄧夢蛟妻十八于歸篝燈佐讀相夫成名列庠序貢成均及夫病經歲卧床褥藥餌之費已耗家業遺一子時氏年二十五歲悲愴痛絕者再其姑哭而慰之曰爾夫不幸罹此旻凶孩甫週予老且病賴汝存此藐孤以續先祀倘爾哀毀致死予與孤將誰倚氏飲泣受命氏素著德容遂毀容截髮足不踰閭孝事姑嚴訓子姑死喪葬成禮子爲娶婦生孫清操苦節殆三十八年

嚴氏蒼梧人年十七適余秀爲妻年二十五秀亡遺孤甫一齡氏於三年內兩遭翁夫喪哀毀幾不

欲生姑老子孩賴氏拮据養育備極艱辛現年五十有三

李氏蒼梧人譚現茂妻年二十四乾隆三十一年九月氏往山掘芋遇強暴歐毆柱氏力拒獲免哭歸訴其夫夫投保隣約次日報官寃治乃李氏羞忿莫釋卽於是夜投繯殞命乾隆三十一年十二月詳請旌表

吳氏藤縣白沙村人譚清洋之妻年十七適譚二十三歲喪夫遺一女無子時姑已先逝翁病在床有叔尚幼穉氏以冰蘖自矢孝養病翁撫育幼叔

立嗣子又亡氏以淚盡血枯之際苦營翁夫兩葬
叔娶女嫁皆拚擋十指也守節三十年雍正十三
年題旌

胡氏藤縣人蘇嗣龍妻生一子名棟夫故氏年二
十守節當吳逆變亂後百苦備嘗養老姑撫幼子
卒教子棟成名數十年毫無怨悔苦節若冰霜人
皆稱羨雍正乙卯詳請旌表

蘇氏藤縣生員陳汝瑾之妻於康熙五十四年二
十四歲守節至乾隆十五年孀居三十餘載題旌
建坊

羅氏藤縣盧沙村何之驥妻年十八于歸二十三
歲夫故氏貞節自守事姑孝親侍湯藥數載如一
日教子嚴爲邑庠廩膳生守節四十六載康熙六
十年卒年六十九歲

黃氏藤縣人鍾元才妻年二十四而寡遺弱女三
歲貧無擔石又無伯叔兄弟可依熒熒隻影奉養
老姑紉紉以供朝夕一女旋夭氏曰是本不足以
代夫後無足悲吾所以不死者爲姑非爲女也及
姑以壽終氏手營殯葬悲痛之聲與織作相間隣
里爲之墮淚苦節四十一年

黃氏藤縣人石輩蒼妻康熙間年二十五歲而寡
遺孤在襁褓翁姑哭子皆嬰病賴氏醫藥侍奉得
愈俱享長年子亦成立氏守節三十二年沒年五
十七歲

張氏藤縣人年十六歸增廣生關作聖二十四歲
夫亡止一女未舉子氏悲痛誓欲身殉翁姑止之
擇四房幼姪爲嗣氏鞠育之長爲諸生氏孝事翁
姑嚴訓嗣子守節五十六年乾隆二十九年八十
歲乃終人稱貞壽

關氏藤縣人年十九適生員徐殿璿生二子長三
歲次纔五月而夫亡氏年二十四歲躬操臼井勤
女紅事姑曲盡孝養次子已娶梁氏旋又溘喪姑
悲悼成疾瀕於危氏百計醫治獲痊至八十六歲
乃終氏治家極嚴整三世孀居門庭寂靜紡績樹
畜能積蓄成家長子釗隸國學有孫八人卒年七
十四歲梁氏亦學於姑二十三而寡矢志冰孀今
年已五十餘矣

胡氏藤縣生員謝霖之妻年十八歸於霖五載生
二女而夫亡慘泣欲殉族親爲之解勸乃誓守志
爲夫立嗣家貧氏親操井臼紡績不憚勞瘁孝養

孀姑撫幼叔育二女日夕涕泗交頤及叔長爲完娶叔謝靈食餼庠序氏望其生子以立夫後而久不得子氏憂愁抑鬱於乾隆二十四年病篤猶含淚哽咽以夫嗣可嚶叔姒而絕其亦可悲也已

王氏藤縣人年十八適胡致浩生一女夫亡氏年二十一歲以楫舟矢志孝事翁姑爲夫立嗣以延其祀守節六十年刻苦如一日

吳氏藤縣胡建和妻年二十五夫亡無嗣氏守志事姑孝養葬俱稱子職立嗣子二督誨極嚴門庭肅穆長幼悉遵其教四十餘年飲冰茹蘗鄉里敬

之其次子有女受蘇聘年十九婚有期矣婿忽病故女聞卽閉戶投繯父母驚覺解救女不食勸之曰汝欲奔喪乎亦宜少食乃進粥父母送至蘇家成服誓守乾隆三十年事也人稱烈女并附載

霍氏藤縣人年二十適生員張珣爲妻越二載夫喪遺孤甫一歲氏孝事翁姑撫訓孤子名列庠序姑終氏哀毀成疾旋卒年五十計守節三十二年吳氏藤縣龍巷村黃正弼妻二十一歲守節孝事翁姑生養死葬皆氏十指苦給爲夫立祀孀居已四十年

李氏藤縣禰洲村廩生石鞏芳繼妻年二十五歲夫亡前妻生有長子已娶又有幼子氏誓志撫育之越二年長子又亡媳宋氏年二十二亦能守志李氏所撫幼子入學李守節三十五歲年六十歲朱守節三十四載年五十歲一門二節鄉人過其閭無不肅然起敬

石氏藤縣人十六適覃君瑗越三載瑗故止生二女氏矢志守貞志子職以事翁姑立姪嗣以承夫祧五十年飲冰茹蘗稱清節焉

唐氏藤縣陳嗣實妻康熙三十二年氏年十九子

歸二十三歲而夫亡有一子熒熒孤寡謹事孀姑教子寓慈於嚴康熙六十年子汝球入學氏年五十一矣至七十五歲孫會遶膝四世一堂族隣具報請旌

鄧氏藤縣羅龍里人陳興道妻年十八歸於陳二十歲生一子夫故氏矢志不移養老親撫幼子苦節已三十六年

胡氏藤縣陳銓妻年二十產一子數日而殤二十一而寡夫亡家貧無以爲養氏哀痛不欲生舅姑泣而勸之氏擗擋十指以奉爲夫立嗣撫如已子

苦節歷三十年

徐氏藤縣吳國璉妻十五歸於吳二十生一子甫三歲夫亡氏以姑病子穉忍泣守志越二年姑亡拮据喪葬悉成禮教子寓慈於嚴弱冠入郡庠氏現年五十五歲

胡氏藤縣垠南村歐中堯妻年十八適中堯二十生一子二十二夫喪時上有垂白老親下有懷抱孤子氏誓奉養存孤苦守爲志乃踰年翁故又踰年子亡哭夫之淚未乾而哭翁哭子至於淚盡聲枯吐血暈死者再立嗣子入庠序四十病故

陳氏藤縣人孫汝需之妻年二十一夫故遺一女無子立嫡伯汝霖次子爲嗣氏秉禮守貞事翁姑盡孝育子寓慈於嚴撻同冰雪乾隆十年病卒

雙節婦霍氏藤縣貢生鄧爲鎬妻年十七于歸二十四歲而寡有遺孤二氏之方結褵也翁姑以其嫺姆教盡婦順意篤愛之及翁姑繼喪氏相夫成禮無媿孝婦迨夫又溘逝呼天搶地痛不欲生顧念藐孤勉收淚辛苦持家日夕忍泣叔若鎬娶吳氏性亦淑慎與氏浹氏方喜謂足相助爲理吳復新寡慘痛如氏喪夫時氏勗之曰孀母然叔有遺

孤子女其善撫之以報泉下吳遂相依守志子年
十七將有室女及笄待嫁又相繼而亡於是吳無
能延殘喘矣霍又百端勸之日媼忍捨我獨苦耶
時次子已出嗣長房擇一孫以承繼吳氏之子協
力同心勤儉擴基業二子皆援例入成均霍年五
十七而卒吳年五十三今尚存

劉氏蒼梧副榜貢生劉昌明女年十八歸藤縣霍
慙舉一子二十二歲夫病氏割股和藥以進不治
呼搶悲痛絕粒翁姑以大義責之乃就食數月孤
兒復歿氏於半夜吞金幾死得救活家人密防護

之後立姪爲嗣撫如已出及翁姑既歿家貧無以
給衣食氏不以爲苦也年五十五歲族黨皆憐而
敬之計守節已三十四年

黃氏藤縣人故廩生霍灼妻生一子踰月夫亡氏
二十三歲堅志守節孝事翁姑辛勤育子子士堯
入學今氏年已五十

黃氏藤縣人鍾甲才妻生一女夫故氏年二十守
節有姿色人皆慕娶媒妁以無子諷氏痛哭卽闔
門自盡得救不死嗣後防範愈嚴非至親姊妹不
與見家貧針黹易食女旣嫁氏獨居三十餘年過

其門者無不哀憐之合學聞其事於學使沈賜扁額曰椒辛桂芳

溫氏容縣人年十六適劉日躋踰年日躋成廢疾又踰年死翁憐其少且無子諭之改適氏痛哭曰夫廢且死媳將身殉翁姑復慰藉止之值歸寧兄亦以適人微諷氏怒卽返自是不復與兄面守節三十六年而卒

雙節婦余氏樊氏容縣人余氏葉啓祥妻年二十二啓祥卒有孤子耄姑氏矢守仰事俯育備極艱苦孤子旣長又卒今年逾七旬矣叔姒樊氏啓祥

弟啓新妻生員長發母也啓新卒氏年方十九歲誓與寡嫂余氏同心矢操紡績奉姑和丸教子論者稱一門雙節樊亦符年例未請旌而卒子長發亦尋卒余尚存庠生周嗣武倡捐共醵金三十兩貯鹽埠生息爲余氏養生送死之資

李氏容縣潘從諫妻舅歿姑存年二十六姑卒未逾月而夫亡氏痛不欲生親戚勸之議立嗣以承夫後氏孀居潔清足不踰閩守節六十五年壽九旬鄉里咸稱貞壽繼子爲邑庠生

杜氏容縣封汝燦聘妻未娶汝燦外出不歸不知

所終父偕媒以庚帖還杜曰度吾子已死毋誤爾女也氏年十七怫然曰是恐我不能守耶生既受封氏聘死當為封氏鬼女在家恐相逼請往封以死守耳父母勸止之不可竟往封侍翁姑曲盡孝養殯葬二喪宗族哀之為立嗣教官朱昌燮黃瓊琚題盡義完貞以榜之今年已七十繼子為邑諸生

趙氏容縣梁亦尋妻姑早喪夫故遺孤甫六齡家貧無臧獲負負獨居惟翁及媳耳氏事翁極恪謹每日早辰上堂問起居而退翁亦常出居外廂氏

親炊羹飯陳於堂率以扣盤為號翁入而食之即出不常相見子成童乃教之延翁侍食守節符年例鄉里無不稱述以為節婦之敦禮義無如氏者覃氏年二十歸慶遠貢生高翀為次室從宦信宜避亂移居岑溪翀夫妻相繼卒遺孤長甫十二即熊徵也次六歲覃時年二十八茹荼守節撫育孤子長熊徵庚子副榜官至兩浙鹽運使覃年六十三卒鄉里稱其賢貞

高氏名粲娘岑溪歸義鄉謝村人兩浙鹽運使高熊徵女適同里李蕃春年二十二蕃春卒無子生

一女守志不二惡衣粗食至老無怨悔邑人咸稱不愧爲高運使女也雍正三年題旌建坊

蘇氏名妹亦岑溪下化羅末人年二十適庠生羅二酉二酉寒士勵志於學氏以紡績佐膏火越四年二酉卒無子氏茹荼集蓼孝事舅姑生死無間家貧衣食於十指自夫歿後雖菜羹蔬食每朔旦必携至墓祭而哭哭而歸鄉人感之咸敦伉儷晚年依其姪孫甘澍歿時六十有八雍正三年題旌建坊

李氏名菊容岑溪上化思勞人年十八適廖言恒

恒貧嗜學赴童試卒於郡氏年二十四止生二女聞訃絕而復甦米漿不入口者三日親往扶柩歸里營葬有陳茂才求伉儷氏怒曰吾惟有一死耳豈事二夫耶聞者咸敬其節撫育二女及長適人氏形單影隻紡績自給艱辛五十餘年至耄不能自膳倚其弟斐春雍正七年題旌建坊歿年八十有四祀節婦祠

鍾氏名先姐岑溪歸義羅許人邑生員鍾鼎女適同里李章章父先卒越數月而章亦亡氏年二十四止生一子甫三歲且罹痼疾氏痛哭欲死者數

四延醫療子數年乃瘳事孀姑以孝聞每遇舅夫
生辰忌日哀泣聲徹隣里乾隆四年詳請旌表

張氏名辛姑岑溪歸義石坡人張瓊女適丁郎村
周尚顯顯卒氏年二十五矢志堅貞誓不再醮家

故貧乏氏紡績以佐翁姑甘旨生事死葬一一如
禮育四女貧益甚暮年不能自給倚次婚高煥然

茹藥飲水數十年如一日乾隆四年詳請旌表
唐氏名三姐岑溪南鄉旺村人唐啓裕女年十七

適同里歲貢生陳克寬為側室與嫡莫氏各生一
子越數年寬卒唐年二十三痛哭幾死者數立志

堅貞誓不再適未幾嫡子亦死唐子尚幼教之讀
書家素貧唐日耘夜績佐子膏火茹荼如飴至老

毫無怨悔隣里咸稱之
馮氏岑溪人年十六適宗連振四年而夫亡子甫

三歲氏矢志撫孤舅姑老力作以養遇歉歲備極
艱辛守節三十六年乾隆六年題旌

羅氏武宜教諭九圉女年十七適岑溪梁上珍家
貧業儒氏勤儉佐讀年二十八夫歿氏投繯以殉

姑急救解之父母欲奪其志氏服毒自誓賴救得
免事舅姑盡婦道守節三十餘年乾隆十九年題

旌

林氏岑溪庠生廷蔚女適馮天位年二十一夫歿遺孤甫數月哭泣瀕死舅姑慰諭乃免就水漿或有以改適勸者氏厲色拒之踰年舅亡越三年姑亡連舉兩喪俱克盡禮守節三十餘年學使羅源漢給清標彤管額以獎之乾隆十六年請旌

李氏藤縣人義寧教諭友梅女年十八適岑溪高若廉五年而夫亡事姑孝姑病數載氏侍湯藥無倦容及居姑喪哀毀盡禮遠近稱孝婦子長堅次賢氏撫教成立並列賢中乾隆癸酉鄉試里

人以爲節孝之報乾隆十九年題旌

高氏岑溪下化鄉監生廖嘉猷之妻年十六歸嘉猷生子甫週歲夫故氏年一十九歲痛夫少亡號泣呼天絕而復甦矢志栢舟撫孤自守迨子復夭折立嫡姪以承夫祀孀居四十八載現年六十七歲

蘇氏岑溪歸義鄉人年十七適貢生高若攀生一子甫三齡若攀亡氏年二十八歲氏奉養誠敬教子有方子列鬢序每歲時及夫誕日忌辰必令陳設遺衣冠於庭率子婦禮拜如生至老不衰嘗買

一小婢越數載矣氏聞婢父五十無子止此一女
卽呼其父焚券遣之曰而女稍長可擇配爲養老
計耳其慈惠類如此現年六十六歲

黎氏岑溪人名神姬年十七適陳以仁生一子十
九歲夫故氏矢志靡他苦節自守姑病百計醫治
晝夜侍床褥教子一以嚴無婦女姑息常態子紹
昌列膠庠猶督責如兒時有唐姓者產女而棄之
塗氏聞之收養以爲己女擇婿嫁之每遇寒食冬
至必親詣翁姑及夫墳墓灑淚奠酒今年五十未
嘗少損悲哀云

劉氏岑溪南鄉人年二十歸莫廷烜相夫苦讀遊
郡庠二十三生一子越月夫故哀痛慘怛三日乃
食粥事翁姑如子教子如父子亦列郡庠增廣生
嫂霍氏產子三日而喪其母氏取置諸懷僱乳哺
之撫育如己子旣長爲之娶又析之產里黨無不
稱其義者

邱氏岑溪歸義鄉高浩伸妻藤邑邱氏女也年十
九于歸生二子而夫故氏年二十八歲哭泣誓以
死殉家人急止之曰而死孰撫幼稚孱弱雙雛忍
爲白髮翁姑累乎氏乃稍解矢志守貞茹冰蘖者

三十四載孝事翁姑俱享遐齡督責兩遺孤不少寬縱每以立品成名爲訓次子巳列郡庠

雙節婦兩李氏岑溪人一適庠生高齊寬寬少年篤志苦學遂染弱症而卒年方十七唱隨僅一週無子今年四十八歲一適寬弟齊信年二十一歸信甫半載夫故亦無子今年五十歲二氏當夫亡時皆痛不欲生翁姑並勸止之三年之內兩寡悲啼於室或勸言曰守節者守其子耳今皆青年無子又家貧守此何益不如早自爲圖後悔將無及也二氏卽翹然曰若以死相逼耶醜顏以事二君

寧餓死不忍爲又何悔於是益深相結二氏本同姓異族至此若同胞然居同處食同爨上堂同起居入室同紡績立嗣同謀撫孤同德教子同義方三十年悲酸辛苦無不同至今稱雙節爲美談焉譚氏女名顯姑懷集人值山寇劫掠一家被難女年十七有姿容私言於嫂曰我斷不受賊辱有死而已過石橋乘空跳下寇視之死矣携嫂去未幾家人贖嫂回詳言其死尋屍得之女農家子不知書其天性貞烈如此

鄧氏懷集梁可贊妻十七歲歸梁二十一生一子

姑陳氏染患背癰不治時夫府試聞訃奔喪哀毀成疾明年夫亡子未週歲鄧氏哭姑哭夫悲慘幾絕誓志守貞翁衰病十餘年氏調護備至及卒拮据成喪葬禮延師訓課子與姪俱入縣庠現年六十二歲計守節已四十年

按懷集縣志附載有高朝科妻岑氏厲志撫孤莫隱妻高氏無子誓死俱未請旌今仍存之

梁氏懷集人生員梁敏女嫁李洪嗣婉婉淑慎孝養孀姑流賊破寨梁氏被擄寇挾以行梁氏曰我祖父詩書禮義之家豈與爾賊求生乎大罵不絕

賊怒抽刀欲殺之氏延頸迎刃曰適我願矣遂被害邑人咸稱其烈

陳氏懷集白沙黃中德妻年二十四德故孀守六十餘年壽八十八而卒教子訓孫著聲譽序乾隆十一年通學以節婦舉學使旌曰霜筠晚翠

高氏懷集人康熙庚子正月流賊劫寧崗高山良塞殺男婦八人氏見賊擒其夫向賊哀泣求釋夫願以身代賊竟捨其夫將挾氏以去氏奮罵賊怒遂揮刃碎其屍

歐氏懷集永固黃耳鼎妻年二十四歲鼎卒氏身

孕越月得男青孀終守卒成其孤乾隆庚申歲以貞節呈舉學使張旌其門日完節成孤

黃氏懷集永固孔式都妻年二十都卒氏身孕越二月得男守節不渝翁死未葬夫故而姑亡並無伯叔黃以一身拊三棺卒能辦葬人稱節孝乾隆庚申歲呈報學使張旌其門節孝垂芳

梁氏懷集孔朝欽妻生員傅良母年二十六而欽卒時良甫三歲家貧親老並無伯叔梁矢志冰孀事翁姑立孤兒翁死殯以奩飾姑病頃刻不離夜眠皆抱其足姑逝貧無以殮屍在床朝夕親爲盥

洗盡質衣物易棺并營葬之其苦節如此

植氏懷集永固孔彰善妻年十九歸善結褵三載善卒植號泣幾絕越三日殮善甫畢植自誓曰吾必從夫於地下戚隣勸止不聽竟憑棺哭絕力救不甦與夫骸合葬家極貧且無翁姑伯叔其塚惟族人好義者祭之

梁氏懷集人貢生植齊鳴母年二十七夫卒殮葬畢鳴甫二歲梁矢栢舟堅守終身室無五尺之童惟以一婢役事茹蘗飲冰三十四年如一日縣志失載其夫名

黃氏懷集詩洞堡植令文妻年二十八文家被擄黃先出幸免文以難死黃悼夫死慟絕數次親屬救甦勸以子幼且懷孕宜自保以撫孤氏遂誓守辛苦持家教子長子宮權列鬻序遺腹子宮校亦成立

梁氏懷集人生員高陞女嫁黎虞賓甫兩歲賓無嗣而卒梁年二十二誓以死從舅姑勸止賴氏孝養宗老戚屬念賓居長不可無後因立其弟之子以承夫祀

謝氏懷集人葉章文妻年十六歸葉二十八章卒

姑孀子幼謝矢志冰蘖姑有弱疾奉侍湯藥澣浴不避穢姑死涕泣盡哀每食必供事死如生始終不懈

陳氏懷集人房嘉勳妻年二十二勳卒一子甫一歲家甚貧種蔬紡績以餬口苦節撫孤成立恬然處之以終其身

附貞壽

壽母長洲民人唐守積之妻李氏生於明末崇禎壬午年及笄歸於唐門事翁姑克致敬養而又勤儉持家撫子孫以慈愛至乾隆六年壽登百歲具

和少府志 卷之十九
詳請乾隆八年奉

旨建坊旌表蒙

恩賞賜絹疋金銀地方官賞賜咸遍里人亦皆製錦稱觴凡四方遠人之來觀壽母者戶外屢滿精神猶健飲食如少壯於女工之事尚殷勤焉至乾隆十三年壽登一百有七歲乃終

貞節壽母嚴氏蒼梧易燦之妻年二十四產一子未週燦亡時四壁蕭然朝不謀夕有姑樂氏年六旬多病氏負姑挈子依父旁舍以居朝夕紡績父亦貧代氏賣布易麻僅資日給姑亡氏拚擋殯葬

家益窘阻饑忍淚守以爲常氏始教子就學稍長訓以勤儉作家業日增諸孫或隸國學或列膠庠皆恪承氏志也乾隆三十三年現年百歲郡人咸稱貞壽遠近慶焉



麻良壽故女顯

皆於承恩志以海潮三十三年庚申百歲人
暗以魂命於夢寐日對前新河東園學河以顯
家益密用勤於家以無常天賦壽千歲也

